

Stromer, Daachdiewe unn onnern Leit

Omm Sunndaach beim Stommdisch hott uff oomol de Karl gesaad: Moin Bub hott merr verzählt, dass in soim Haus vor e paar Daach enn Stromer gewese iss.

Was?, frächt de Schorsch, enn Stromer war bei doim Bub? Wer hodden den ins Haus gelosse?

Ei er sellwer, dut de Karl ze Ontwort gewwe.

Josses naa, saach isch, enn Stromer deet isch nitt ins Haus losse.

Doo seet de Karl: Du deetst dess aach, wenn bei dir allsfort die Sicherunge dorschbrenne, doin Kiehlschronk warm werdd unn du waaßt nitt wessweesche.

Die Schorsch seet: Ei dess war gar koon Stromer, dess war enn Elektriker?

Doo guggderr, gell?, seet de Karl weider, genau dessdeweesche habb isch dess eich joo verzählt. Weil mir saache monschmol ebbes onnersders wie unser junge Leit. Bei uns issen Stromer su ooner, der sisch erumtreiwe dut, unn doo habbderr recht, su ooner deet aach moin Bub nitt in soi Haus losse.

Isch frooch: Waaß doin Bub eischendlich, was mir moone, wenn mir Stromer saache dun?

Dess isses joo, moont de Karl, der musst sisch erst druff besinne, dass er dess aach emol gewissd hott. Awwer er deet nitt glaawe, dass soi Flerschemer Kummbeern sisch aach doodroo erinnern kenne.

Isch saach: Ess dut su Ausdrigg gewwe, die werrn su longsom vergesse, Daachdieb iss aach su ooner vunn dene. Wenn mir frieher gesaad hawwe, dess issen Daachdieb, doo hawwe merr debei e bissi gegrinst, weil dess iss joo eischendlich koo Wort gewese, wo sisch ooner driwwer uffreesche musst, im Geeschedeil, der hott aach gegrinst, weil als Daachdieb e bissi onnersders gewese iss als unserooner, debei issen Daachdieb eischendlich enn Dauchenix.

Moont de Schorsch: Dess hawwe merr awwer mieh su moralisch gemoont, weil su enn Daachdieb hädd enn gude Stromer soi kenne, also enn gude Elektriker.

Isch saach: Su ähnlich isses meddem Spitzkligger, dess iss monschmol aach su, dass sisch doo ooner gebauchbinseld gefiehd hott. Weil dess iss enn Drückeberger odder ooner, der druff aus iss, bei jeder Geleeschenheit e Schnäbbsche ze mache unn wens iss, dass er dir beim Aldi ebbes außem Waache numme dut, weil vunn dem wasser hawwe wollt du dess letzte Schdigg kriecht host. Odder wenn ooner disch irschendwo uff de Londstrooß mett soim Audo iwwerholle dut, onnere Stell, wo du longsom fahrdust, weil doo e Schild iss mett Sechsisch druff.

De Karl hott geniggd. Isch waaß nitt, ob moin Bub noch waaß, was e Schmaaßmigg iss, also ooner, der gons uffdringlich gons noh bei disch kimmt. Odder obber waaß, wenn ooner dess beiner Fraa mache dut, mir gesaad hawwe, dess issen Deddscheler. Odder dass er waaß, wassen Hoomdugger, also enn Hinnerlissdische iss.

De Schorsch seet: Ja, awwer die neie Ausdrigg sinn aach nitt schlecht. Hadde mirs nitt vunnem Stromer gehabbd? Doo kennt merr joo saache, de Seehofer iss enn schleschde Stromer.

Isch frooch: Ei warum donn dess?

Jetzt grinst de Schorsch. Weil der Strom vunn de Windmiehle hawwe, awwer koo Leidunge deferr baue will.

Eiern Honnes